


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 54 || No. 08

August, 2018



Editor: Rev. Stephen Chinzathang

Synod Kumpuon: **"Pasian thuguh kem"** (I Korin 4:1)

Khristian Tangkou

Vol. No. 54 || Issue No. 08 || August, 2018

Editorial Board

Editor : Rev. Stephen Chinzathang - 9863042789
ct_stephen@yahoo.com

Joint Editor : Rev. Khamchinkhai - 8730933744

Cir. Manager : Upa Jamsianmung - 9862086615
sianmung@rediffmail.com

Bus. Manager : Upa Kamgenpau - 8974612937
Shie T. Ginzahau - 8974438842

Cont. Editors : Upa Khupsuankham - 9856406454
Rev. Awnkhankhup - 9862828921
Rev. Dr. Hangpi Manlun - 9862910875
Rev. Kaimuanlal - 9862923960

ZOU SYNOD ULIENTE

• Moderator:

Rev. Awnkhankhup

• Moderator Elect:

Rev. Dr. Hangpi Manlun

• Secretary (Sr):

Upa Er. Thangchinmang

• Secretary (Jr):

Upa Liensuonkap

• Treasurer:

Upa Chinsuanthang

• Statistician:

Upa Khaihenthang

• Executive Secretaries:

Rev. Stephen Chinzathang

Rev. Khamchinkhai

A sung thu

- Editorial..... 01
- Thu tuomtuom & Thumpi ding..... 02
- Report 04
- Nu ching ka sahte 05
- Youth Corner 07
- Biehinn lam: Hattuum phelsie 10
- TMEF sutzopna.....17
- ZPWF Cumlumn 23

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



Editorial

Khanglai Day 2018 | Khrist a Gimnamtui

A Mangtoupha nuasie a, eite a ding a Pa Pasian mai a gimnamtui a, A hinna hing lankhie i Mangpa Jesu Khrist min in tam i Khristian Tangkou simtute zousie chibai ka hing buh masa hi.

Pasian mapuina toh kum kimkhat bei zou in July-August ah i ding touta uhi. January 2018 hun lai vel in kum hing bei hun ding gamla mama dan in a bang a, hinanleh tu in kum kimkhat zou i hita mai uhi. Neulai hun in lounasepte zou a, naupangte School kumtawp exam zou a, noplen hun leh Khristmas hun nopte i ngahla ziehun kum tung ha a bang deu a, tulai in ahileh kum zong a tom deu a bang maita hi. Tuachin hun sawtlou bang nanleh kum kimkhat val i zang zouta ua, tu in August kal tawp ah Khanglai Ni i galdot uhi.

Mihing damsung in i pien a kipat i shi tan ah hun tuomtuom i pal tou ua, tua hun tuomtuomte lah ah mi zousie kinepna leh ut hunpen khu “Khanglai hun” ahi hi. Naupangten zong **nungah-tangval** hun a ngahla ua, tuama bang in khanghamten zong **nungah-tangval** lai hun ma a lunggul kia ua, hinanleh hinkhuo khu lampi khat, nua kia um theilouna (one way) ahizieh in koiman double in a zang theisih hi. Tuachin Khanglaite khu mi zousie dei ahia, Government, Politics sai lamkaite leh Hattuum ah zong Khanglaite deipen ahi ua tuabang ma in Setan in zong a hing dei hi.

Tambang kal ah tu in Khanglaiten Mangpa a ding in gimnamtui in i pang thei ua, Setan a ding in zong i pang thei uhi. Mihing hinkhuo ah a hoi lam sangin a selam panmun a hoizaw a, leitung damsung ah zong a hampaha zaw a bang uhi. Hinanleh nuomman a um tuohtuoh a kumtawn hinna leh kumtawn shina ahiding hi. Tunin heilam ah i pang ding uoi?

Mangpa ding a pangten nuomman in kumtawn hinna i mu ding ua Setan a ding a pangten nuomman in kumtawn shina i tang ding uhi. Thugenpa 11:9 ah, “Aw khanglai, na khangdawnna ah kipah inlen, Na khangdawn lai nite in, na lungtangin hing kipahsah henlen; na lungtang deidan danin um inlen, na mit mu a hoi na sahna lamlam zuin; Hinanleh tami zousie ziehin, Pasian in thukhenna ah hing zawpi ding ahi; chi thei in” chiin ana gen hi.

Tuaziehin Pasian thukhenna a ding chiet ding ihi ziehun koipen a ding a gim namtui a pang ding ihiei Khanglai!?

.....

Thy tuomtuom
leh
Thumpi dingte



1. Kumkim tan a khut hat a hing pui galkai a Ama nna isepna Zou Synod pawlpi a kikkaikhawm ten i HIMLANG te enkawm in kum bullam sang a Hattuom chin a sum kemtuten kisiemtha in panla tha chiet vaui chi i thumna zong ahi. Thumpi in ...!
2. Kholum khovawt kihen lamdang zieh in natna, satna atam a, damtheina tasam mama te a din DAMNA ngetpieh va ui

3. Eite tang a Jesu minsuong a KHANTANHOI nasem a khovel gam zousie a kalsuon tute a din ana thumzing va ui tawp lou in.
4. I Nam leh i pawlpi lamkai ten DIHTATNA amanphat dan thei a, dihtatna toh ang kilamtha thei chietna ding un ana thumpi chiet vaui.
5. I pawlpi sung a Pastor nasem, Sawltah nasem, Sangsye nasemte amau hina thei zou nonlou khop a i pawlpi a dinga ling leh khau bangte a din bang hun ah zong mittui luongkawm in thum chiet vaui.
6. ZPYF DAY: I Synod Year Planner a umsa bangin Pasian hoina leh mapuina muongkawm in angtung ding August 26, 2018 (Last Sunday) Khanglai Ni anuomthei pen leh a manpha thei pen a mangchiet dingin ikingen uhi. I nichin thumna uah bawzui chiet vaui. Tuohkhawm pen Head Office a submit chiet ding ahi.
7. Bangaluru leh Chennai Hattuum vena: 5th Synod Office Bearer thuphasah bang in Bangaluru leh Chennai Hattuumte vena nei dingin Rev. Khamchinkhai, Executive Secretary Synod Office bearer in kiguot hi. Kalthum (3 weeks) vatham a Hattuum te vekawm a Sacrament vabawl ding a. Ama apeisa July 24, 2018 chiengin Hattuumte ve dingin zinkheta ding hi. Hattuum leh mimal chinin thumsah vaui.
8. Latha bu kisun lellel: ZCMC lemsahpina bang in 3rd Synod Executive Committee thuphasah bang in Thawnsau Offset Press a Copy 5000/- (Sangnga) sut ding a phasah ahia, kisun lellel hi. Pasian biehn leh phatkhawmna a vanzat manpha ang hitheina dingin thumna toh thei chiet vaui.
9. Writers Workshop (PCI): Ang tung ding August 21-24, 2018 sung PCI Office a Workshop a vatel dingin Upa Liensuonkap Secretary (Jr) leh Miss Niangsuannuomte Computer Operator guot ahi uhi. Thumna toh bawzui chiet va ui.
10. PCI General Assembly Committee: Pasian hoina leh mapuina muongkawm in ahing tung ding 1st-2nd August 2018 sung dai in

PAH Shillong ah PCI General Assembly Committee um ding hi. Khumnah Synod chin ah palai (delegae) in vatel ding uhi. Lawching taha aneitheina ding un thumpi chiet vaui.

11. NEICC Committee: Pasion hoina leh umpina muongkawm in ang tung ding 6th September 2018 chiengin PLATINUOM JUBILEE HALL Shillong ah North East India Christian Council (NEICC) Committee um ding hi. Khumnah palai poimaw tahtahte vatel ding uhi. Lawchingtah a ang nei theina ding un thumna toh bawzui chiet vaui.
12. Tuha ZPYF-Khanglai ni ahina toh kiton in ZPYF Leader, Secretary, Office Bearer, Central Committee te adin, kituohna, kilemna pankhawm siemna leh kideisahtuonate ngetpieh vai. I ma naw ah ZPYF(General Khawmpi) zintuntu ding Behiang Khopi a din zong ana thumzing vai. Amunpen Central Committee in a zintute ding a host a unit te toh vapei a kihou chien din phasah uhi. ZPYF kumpuon: “Khanglai Jesu Khrist adia ginnamtui” chi ahi (II Kor. 2:15).
13. MSc 76 percent in zou: Mr. Khaiminlun s/o Rev. Dr. Hangpi Manlun in NEHU, Shillong ah Master of Science (MSc) Enviromental Science result suoh a, 76 % (Percent) in zou hi. Ama’n MSc a zilsung in NET zong zou chi’n thutut kimu a, i lungdampi mama uhi.

Reports

PRESBYTERIAN YOUTH FELLOWSHIP CENTRAL DISTRICT, SOLFA CAMP REPORT - 2018

- | | | |
|-------------------|-----|---------------------------------------|
| 1. Ahun | : | June 11-16, 2018 |
| 2. Amun | : | District Pastor Quarter, Zomi Colony |
| 3. Camp Honna | : | Rev. Lamsuanthang, Biel Pastor |
| 4. Camp Director | : | Tv. Jacob Seiminthang Asst. Secretary |
| 5. Kipahthu genna | : | Leader PYF Central District. (MGP) |
| 6. Instructor | i) | Pa Samuel Khamsuankhai |
| | ii) | Tv. Manglunthang |

iii) Tv. Liensuanlal

7. Camp khahna: P/P Ginlienmang

8. Panpina pete kunga kipahtugenna:

i) District Pastor Quarter hing zangsah Central District lamkai te.

ii) Presbyterian Women Fellowship (PWF) Central District Rs. 5000

iii) Pa Paugtung Mannieng khuo Rs. 500

iv) Tv. Tuonlienhou, CCPYF Rs. 100

v) Tv. Paukhankhup, Mannieng khuo Chini 1 Kg.

= Camper Khanglai mi 13 vel tel thei uhi.

= Solfa zilteng amauh siemna banga Certificat pieh chiem uhi.

= Solfa Camp dam a hing zang zousahtu Mangpa'n thupina zousie tang hen!

= Solfa Camp a lawchin theina ding hing na thumsahte kung ah lungdam thu igen uhi.

Report petu,

Secretary PYF Central District (MGP)

NU DIA CHING KASAhte:

= Niteng a innkuon MAITAM ngai poimaw a, zang thei a lamkai zing te.

= Tate School kai kuon chienga THUMNA neipi gige te.

= Neh leh dawn a khentuom nei lou HAWM diel diel te.

= A pasal kunga a innkuonte gen leh HEEH thang sahlou te.

= Innsung a KA, KA, KEI, KEI chi haam kam zah thangsah loute.

= A pasal innkuonte toh kizopna hoitah bawl thei a, a innkuonpite ngaina thei te.

= Nuolam suong thei napi a suong hetlou a, kiniemkhiet tah a hing theite.

= A tate laisim sungteng LUPSAN lou a daw zou taha ngaah thei gige.

= Pasalte' zinkhiet ding chienga THUMNA toh hakhie thei zel te.

= Tate' mapui a, atate toh BIEHINN KAI ngaisah mama te.

= A pasal vaitun chieng a siltung asie-apha kamsiem a awl a hil

- thei te.
- = Pasal te thugen lai a, haam tulou a, atate zaha lamkaite DEM chinglou te.
 - = A pasal in he a a taichieng a HAPSUO pai lou a kiniemkhiet thei te.
 - = Ama sepkhiet zil a KHOSA SIEM a apoimaw tawmsah a, lungkimtah a um thei te.
 - = Ama dinmun leh hina toh kituoh a siengthou taha KICHEI siemte.
 - = Ki cheina chite habawl lou a van SUOH THA teng lunggul talawm loute.
 - = A pasal innkuonpita a innsung ua ZALENTHEINA inn nu a na hite.
 - = Pasal toh kisel hun a, a pasal innkuonte kung a lungsim NATNA tun ngamte.
 - = Pasal kung a lungmuong leh zauthawng lou a CELL PHONE nuasie ngam gigte.
 - = A teehpu/teehpi guoljawl thei dia hing a GUOLJAWLNA uh ngen ngamte.
 - = Tam bang hina neite “NU” ching sa pen ing.

R/M. May-June 2018 issue apat lahsawn.

REVIVAL-CUM-SEMINAR

A hing tung ding August 9-12, 2018 sung in Presbyterian Church of India, Zomi Colony ah Revival-cum-Seminar um ding a, Rev. Tongminthang, Care & Concern Ministry in “Tambang lawm a Hundamna loupi khu i nahsah sihleh” chi thupi zang in Pasian thutah gen ding a, tualeh “Innsung leh khotang a Numeite mawpuohna chi thupi zang in Seminar zong lamkai ding hi. Tam hun lawching tah a, a hing zaw theina ding un thumpi chiet va ui.

Youth Coner:

WORLD CUP - 2018

A ZILKHIET MASAH PEN

KOIMA ama tang a lawi kumlou in a hat tuom dieh sih. Tupna, kimuonngamna leh kipumpiehna in GOLIATH banga huphul um zong ahi zaw thei ahi. Tutan (June 17 nitah tan) in a mu uh result-te in Foot ball punditte zong a sumuolphou zou uhi. Prediction dih tah aum thei sih. Lamdang na e...! chi ding ngen ahi. Result lahlah a lamdangpen Iceland in (1-1) a Argentina a ki draw mai uh pen ahi. A engtat ahi loungal uleh koi mawngmawng in tami result pen ana gen loh ding adiei? Alamdang diehna Iceland mihing 34,000 vel chau tenna ahi. Tamte lah ah Football pehthei kum 18-35) kikal teldoh ding hileh atawm ding dan...! Ana sep na zieh foot ball pehman lou tamtah um kia ding. Tuaban ah a tellou pawl paikhie kia in, a pienken a

miphalou leh a zawngkhal teng, khamthei bawl teng paikhie kia lechin tawm tava uh maw...! A um nalai teng lah ah football lunglut lou a sports danga kipie lakhie kia lei tawm ta mama va uh. A um nalaite lah ah Fool ball nehsuina ding a zang enkia lechin bei utta ding uhi. A Coach uh Heimir Hall grimsson ha (dentist doctor ahia, parttime a football buoipibep ahi. A goal keeper uh Hannes Halldorsson Messi goal peh save pa pen film director na hi nalai hi. A goal khumtu Alfred Finnbogasson ahi leh Professional ahia, Budesliga ah FC Augsburg club ah tel minthang lawmlawm lou ahi. Ngainop umtah khat ahileh Goallie Halldorsson in Messi PENALTY pehna Video teng ala khawm a, a keng zah dan teng ana suichien a khumni in pen “A zietlam a peh ding ahi

chi ka thei a ka baw mai ahi achi hi. Film bawl kawm kawm a penalty save dan a na zilzou kei ahi. Akhai, part-timers te in Messi leh a company te draw mai uh maw...! Argentina te champion hing hi dinga, a kineppite a dingin mai muol khopa ngaituo ahi ta. Mixico in defending champion Germany (1-0) ah pen koi a bet (atha) ngam a um diei? Adeisah seng zieh ahei, Germany in Russia 2018 FIFA TROPHY domkia va chi kinepna a subei mai hi. (GERMAN ARE GERMANS THEY WILL COME BACK). A lamdang mama khat Brazil-1 Switzerland-1 result kia vang zong ahi kia hi. A engtat mawnglou ngal in tam result pen koi in ana predict ding ahiei? Baichung Bhutia lawi zong vang zum mai va uh. Expert dan dan a predict bawl uh hiven, adih aum diei? Switzerland in Brazil GOAL khum siemte nan zawna ding dan ana zilzil mai ding uhia, a coach uh stretegy dih mama hi ngei va, opening match etnop umlou tah a langlamte hatlou taseng mi phunna Russia a ding in vang ahoi himhim hi. Saudi Arabia (5-0) in a zoukhe

uhi. Saudi Arabiate goal khum siempa (AL-SAHLAWI) la pia thei lou khop in akoi ua, Al-Sahlawi qualifying round ah goal 16 khum top Scorer a pang ahi adang ah Lewandowski panna POLAND te peh kimu nailou Host Nation Russia in a telna masa pen uh tambang a azouthaw mama ua, gam pumpi a dingin kipahna lientah siemsah va. Tutan a match nuom pen a mi tamtah in a ngai uh Spain leh Portugal pehni khu ahi. Heilam panpi nanlechin dipkuo lou in enthei sih vateh. Eimi tamzaw ten Spain abang hi. Hinanleh Champions League final a Liver Pool te Mosalah tung ah Fault melsie tah (Wresling bangmai) tam faul a kisuhkhah zieh a Egypt te first match a pantheilou law, tam fault bawltu a career ah red card 24 ana mu Sergio Romos zieh a Spain deisah zou talou tampi um kia. Tam match ah mi tamtah ama ngaina lou te nasan in angaisang law uh CHRISTIANA RONALDO kipumpiehna khu ahi. Agam a ding a shingam a, a siemna leh atha neina zousie zang ngam Spain defence hoitop leh world class goal keeper De-

Gea phu phei a hat-trick 51na leh World Cup ah zong hat-trick 51na a pehlut maipen a gam in zong manghil talou ding ahi. La Liga Club chin ah defender thupi teng panna Spain Goal ah thumvei match khat a pehlut maipen nasa mama mai ahi. Koiman ana bawlkah lou bawl ahi. La-Liga a ki lanpi zong Busquest fault free kick amu a, peh lut mai pen ki letsah huoi khat ahi. Tam masang deu in Spain Sorkar in tax pe dihlou chi'n million 16 a lieu ding a, chiin ahing phuong doh chet uhi. tam dawnna ah Spain goal ah thumvei apehlut hi chi'n Social Media tungtawn in ang kisuo sausau hi. Tambang lungsim nuomlou tah a pang hiding ahia, Spain panpiten zong thupi sa thouthou va uh. C. Ronaldo angai sangna zieh un thupitah khat khu "Leadership" ahi. A lawm te a hanthawn zou mama hi. European Cup alah ni un ama kisukhah zieha minute 25 zou a pang zom theilou hinanleh ground puolam ah bai kawmkawm in atai viel a, a lawmte suhthathou a, Cup alah uh ahi. A langte uh Francete amau khopi Paris ah ava kipehpi kia nalai. Tam final match a aki

suhkhah in minute thum pawlang ah apawt a, alutkia thouthou a, minute 25 in a nat thuoh zoulou in da mama in mittui luong pum in ahing pawt hi. Hinanleh alawmte suhtha thou a, a bawl zawm peh a, ava zawpi thouthou hi. Tambang kipumpiehna leh gam a dinga kipumpieh leh gam ading a bangteng huom pen koi in ngaisang lou ding e..? Tamtan a i zil khiet thei dan in koima musit thei ding aum sih. Mizong amau gam chiet a kijil siem chiet, kisingsa, panla, mi theilou kala saupi ana tung ahi ta uhi. Koima zatuom, zatuom ding zong a um sih; ama kihabawl a, kisa zouten vang GUOLZAWLNA tang zel uhi. Tu a na dinmun zong mi musit leh ngaisang lou nahi maithei, Mi lah a pang ngamlou zen a kingaisie nahi maithei, Hinanleh lungkiet mai ding ahisih, ama kihabawl zou, kizil pei, lungke mailou a pang ngamte mi lawching ahi. (Hakia chieng Champion tha ang um chiengin June 18 apat July 15 sung a match umte apat thei ding kilawm leh zil dia manpha simkia ding ihi uh).

BIEHINN LAM IN HATTUOM PHELSIE

Late 127:1 & 2

- Pa Kamkhogin
Central Church

“Mangpa’n inn a lam sihleh, alam miten a semgim thawm giap uhi; Mangpa’n khopi a ven sihleh aveng mite a hah thawm giap uhi. Zingmawng matah a thou a, vaigei tah a tou a, sepgimna tanghou na neh uh nou a dingin athawn giap ahi, tuabangin Aman a itte khu a imusah zel hi.”

Thumapui:

Mihing khat a piengkhe khat phot in alouthelou in tenna inn khat a poimaw hi. Tuami tenna inn ah, innkuon a tengkhawm in, nei-le-lam, kitang in, neh-le-dawn ah nekhawm-dawnkhawm in ki-ittuo tah a tengkhawm uhi. Tam inn khat a khosakhawmte khu innkuon a kichi a, tennagiehna neilou keei in innkuon kisiem theilou chilei i chi khiel sih ding uhi. Tuachiin innsung ah nu-le-pan vaihawmna, sep-le-bawl, sum-le-pai suina leh tate etkolna ah mawpuohna sangpen a puo ua, tam innsung ma ah neh ding-tah ding, dawn ding kibawl in kine, kidawn hi. Tuachin tam inn a hoileh a sung a teng innkuonte kizatat a, a hoi sihleh ki muneu in ki simmaw hi. Nu-le-pa dinmun khu a tate uh a hing vahkhiet chiengun a hindan leh kichei dan uah a kilang a, tuachiin miten nu-

le-pa ching leh chinglou a te thei uhi.

Tualeh, mihing bangzat ahiei khat a hing kigawm ua, a hing tenkhawm chiengin innkuon khat kisiemkhie a, tuama bangin innkuon bangzat ahiei khat kigawmten khuo khat a siemkhie uhi. Tam khuo ah Vaihawm dingin Hausa-Upa um a, amauten khosung hoina ding a deisah tuom neilou a vai a hing hawm chiengun khuo hing piching in miten beltah a sah ziehun mi hing tenglut zel in khopi a hing suoh thei hi. Hinanleh Vaihawmna a hoilou chiengin koima lungkimpen umlou in khosung zong kituohlou in khuo mangthai thei veve hi.

Hagau Innkuon:

I pu uh Leng David tapa Leng Solomon in Laate 127:1 & 2 ah Mangpa toh kilam leh kilamlou

innkuon ban ah Mangpa toh
Khopi ven ding thu ana gen a,
tualeh aban 127:3-5 ah Tate khu
Pasian apat guolzawl na ahi dan
a gen a, guolzawl na tah vawt ahi
dan leh a manphat dan uh zong a
gen hi. Tapa khu Nu-le-pa a ding
a manpha ahiban ah tapa neite
mihampha ahi dan uh zong a gen
hi.

Pasian in mihing ana siem in a
tenna ding Eden huon ana siemsah
a, tuanah ahileh Mangpan “Inn”
a bawl chi a kigiel khasih a, Eden
huon ah um in nuom asa mama
mai uhi. Tualeh nihten-puonsil
ngailou in neh-le-tah sui ngailou
in huon sung a singgate amau du
dandan ua ne in lungkimtah leh
nuomsa tah in a khosa uhi.

Hinanleh Pasian thugen manglou
a, Setan solna zieh a Sie-le-pha
theina singga a hing neh tah
chiengun Eden huon apat delkhiet
ahi ua, Eden huon bangloutah
in tam Eden huon pulam ah
ahilehvang sil-le-ten, neh-le-tah
a kisui uh a poimawta a, tuabang
ma in tenna ding zong poimawta
ahi ngei ding a, khosah a hing pan
uhi.

Thuhun Lui lai apat in inn hoi
leh kulpi det ana ngaisang mama

mai ua, puonbuh ah bangtan ahie
a ten zou nua un inn te lam in
Lengte hun ah zong theitawp suo
in Leeng innpi ding bang zong ana
lam uhi. Tuaban ah a khopi bitna
ding in khopi kulpi thupi tahtah
bawl in khopi vengtu muonhuoi
tahtah kikoi in tuachin a sungah
hamuongtah a, teng in neh-le-tah
sui in a khosa uhi.

Tambang ahizieh in i Hagau lam
kisiemphatna leh bitna ding in
Solomon in Pasian toh inn
kilamloute leh Pasian toh khopi
kivengloute a phattuomlou dan
ana gen hi.

Pasian in Ami tel Israel-te khu
innkuon khat bang in a na gen in a
na enkol a, tuabangma in tulai hun
ah Khristian i hing hi chiengun
Khrist nuajui zousie khu Innkuon
khat i hi dan genna in Khrist a
unau/sanggam bang in i kihan
uhi. Adiehin Khosung khat a
Biehinn khat a kikhawmkhawmte
khu Innsung khat bang a ki-enkol
in, nopna-dana ah kithuop in
tahsa leh Hagau a i masawn theina
dingun kipuihuoi in i tengkhawm
uhi.

Innsung Nu-le-Pa dinmun:

Tam Hattuom khat sung ah
khun Lamkai ding i kitel ua, Upa

vaihawmte chi dandan a tawn in Jesu Khrist in a Hattuum (innkuonte) enkol ding in mawpuohna a hing pie a, Pastor, Upa leh Local Church Committee member-te khu Hattuum a dingin Nu-le-pa ahi ua, amaute nasep thupipen khu Pasian Hattuumte khantouna ding ahi hi.

Hinanleh innsung kituohlou in Pasian toh tengkhawm sihlei bangchin innsung a nuom in a bit thei diei? Innsung ah tate khu Nu-le-pa lungkimna ahiban ah kipahna leh kinepna tuntun ahi ua, ta neilou nu-le-pa khu bangza a lunggim leh kingaisiet huoi adiei chi i lungsim chiet uah zong ngaituolei i thei thei mai ding uhi. Tuabang in Hattuum sungah Nu-le-paten nasatah a pan i lahnate khu a hing khanglien ding tate kinepna leh ama ua ding khuolna ahi.

Innkuon khat in inn thupitah, Building a sawng in lam henlen a sung a teng a ji-le-tate a ding in a neh thei uleh a du thei dinguh pelou in kithupisah tah in umleh bangchin i ngaituo ding uoi? Nu-le-paten innsung ka thuthu chi mawh in a tate ngaisahlou in amau tegel in a dudu uh ne uhenlen a tate uh neh ding pesih uleh bangchin i ngaituo ding uoi? Anneh leina ding tengteng innlamna in kizang sieng taleh mipil a kichi thei diei? Inn thupitah lam in ann dulou leh ne ngaplou in um in damlou hilei, guta hing pei taleh gilkiel leh basampi in i inn i veng zou nading uoi?

Biehinn leh Pasian Hattuumte:

Tambang in tulai i hinkhuo uah Hattuumte kidemna khu Biehinn lam ahia, Biehinn thupi tahtah lam in i kidem ua, i Biehinn a thupileh i kiletsahpi mama uhi. Ahi, Biehinn poimaw ma hi. Lai Siengthou i sim chiengun Pasian in HAGGAI 1:2-4 ah ***“Muol ah kuontou unlen, sing va la unlen inn lam un, tuachi’n tua khu ka kipahpi dinga tuachi’n pahtawi in ka um ding, Mangpa’n a chi hi”*** ana chi hi. Hinanleh a kivat khat um in ka thei hi. I Biehinn lamte Pasian dei bang a i lam ahi nadiei? Biehinn leh i biehnna koi a poimaw zaw diei? I Lai Siengthou tang tel uh Laate 127:1 & 2 ah ***“Mangpa’n inn a lam sihleh, alam miten a semgim thawng giap uhi; Mangpa’n khopi a ven sihleh aveng mite ahah thawng giap uhi. Zingmawng matah a thou a, vaigei tah a tou a, sepgimna tanghou na neh uh nou a dingin athawng giap ahi, tuabangin Aman a itte***

khu a imusah zel hi” chin Solomon in chiengtah in a gen hi.

Tualeh Israel-te hinkhuo i et chiengun Mangpan Mosi zangin Biehbuh bawl ding in ana sawl a, Biehbuh a ding in michin in a kiphah dan bang a tuoh ding in a gen hi. *Pawtdohna 25:1-9* ah “*Tuachi’n Mangpa’n Mosi ahoup i a, a kungah. Israeltate kungah gen in, “Kei a dingin sillat hing tawikhawm uheh: michin a lungtanga kiphaltah a pe poumate akipat, kei a dinga sillat dingin na la ding hi. Tualeh ama ua kipat a sillat na lah dingte khu tamte ahi; sanate, dangkate, sum engte; Vau zam engdumte, sandupte, sandangte, vau-malngatte, kelmulte; Belamtal vun bum-sante, saham vunte, gichil singte; Meivah a zahding thautuite, kinu ding thaunamtui leh hal ding sil gimnamtui tah toh; Siempu puon leh a awm tuomna a zedingin Onix suong leh suongte toh; Tualeh mun siengthou hing bawlpieh uheh, alah ua ka ten theina dingin. Biehinn lim leh a sunga vanzah ding zousie, lim ka hing etsahte bangbang a na bawl ding ahi.”* a chi hi.

Tulai in bangchin i lamta uoileh? Manipur Singtangmite 100% Khristian kichite in bang atai i

bawl uh? Koima Mangpa a ding a kipie um talou ahiei? Ning gawp ihita ding uoi? Ahilouleh Vaihawmten hawm siemlou ahi uh ama? ki-en pha va ui. Solkal phallouna mun ah dan dihloutah in Biehinn i lam ua, kineisah leh kibawltheisah deu mai in i um ua, a sung ah Pasian bie in kipahtah in i lam uhi. Ei kipah bang in Mangpa a kipah nadiei.

Leeng Saul hun lai in Pasian thu a manlou ziehin Mangpan Saul a nuolta hi. *1 Samuel 15:14-22* ah “*Hinanleh Samuel in “Ka bil a belam ham ging leh bawngtal hamging ka zahte khu bangchidan ahiei leh?”* achi hi. Tualeh Saul in “*Amalekmite a ahinglahpieh uh ahi; Mangpa na Pasian kunga kithoina dingin, mipiten belam hoipen pente leh bawngtal hoipenpente akhawi ua; adangteng athatgam sieng uhi, achi hi. Tuachi’n Samuel in Saul kungah, khawl tadi vawi! Mangpa’n zani zan a ka kunga agen khu ka hing hilding hi, achi hi. Tualeh Saul in hing gen ve, achi hi. Tuachi’n Samuel in, Nangma ngaiin mi neunoukhat hinanlachin zong, Israel nam pumpi lutang hilou na hiei mah? Tualeh Mangpa’n Israelte leengpa dingin sathau ahing nu hilou na hiei*

mah? Tuin Mangpa'n nang nna khat semdingin ahing sawlkhie a, na kungah, kuon inlen Amalek migilou haw, thatgam sieng inlen, a unpi ua amanthai masangsie uh dou zel in, ahing chi hi. Bangdinga Mangpa thu manglou a, gallah silte, abaw a na bawthaw a, Mangpa mitmu a sil hoilou na bawl ahiei?" achi hi. Tualeh Saul in Samuel kungah, "E! Mangpa thu ka zui vele, Mangpa'n ahing sawlna ah ka pei a, Amalek leengpa Agag ka hingmat a, tualeh Amelekmite ka thatgam siengta hilou ahiei amah. Hinanleh mipiten thagam ding hinazenpi, gallah sil belamte, bawngtalte, sil hoi penpente, Gilgal a Mangpa na Pasian kunga kithoina dingin ala uhi." Tuachi'n Samuel in: "Mangpa'n, Mangpa thuman a kipahpi bangin, Kithoi na leh halmang sillatte akipahpi a mah? Ngai in kithoina sangin, thuman ahoizaw a, Belamtal thaute sangin, thuzui ahoizaw hi" a chi hi. Sawltah Paul in zong Vaihawmte thu man ding ana gen uong mama hi. Dan dihloutah a Mangpa i bieh chiengun i bieh uh Pasian a lungdam diei? Israel-te kung ah Mangpa na biehpiehnate uh ka ning a, ka kidah a, ka luoh a suoh hi ana chi hiel hi. Khumte khu bang zieh adiei?

Khenkhatte kia in ahileh Hattuum mipiten **"Pasian in kei a ahi"** a chi zieh a Pasian thumanna, Pasian jatatna leh A thuchiem tangtunna ding a **Sawm-a-khat** a hing tawikhawmte uh leh **Ginna thuchiem, Missionary Box leh adangdang** gin-umtah a ana kholkhawmte uh a tunna ding a kimtah a tungsah talou in kithuneisah tah in Biehinn lamna, Missionary chawmna, School bawl a Sangshiete law ding a zang leh Bible zil chawmna bang in i zang kia leuleu ua, Biehinn sung ah Pasian bie in lim in i laam uhi. Pasian in bangchin a ngai tadiet? Mosi in Israel-te a pui lai in Pasian gen bang in lamkai a siem a, mi 100 tung a lamkai bang, mi 50 tung a lamkai bang a siem a, hinanleh tuaten Mosi tungah thu a nei theisih ua, Pasian in Mosi ma zang in a houpi a, lamkai khenkhatten Mosi a dem lai un Pasian in a that nalai hi.

I kivaipuohna uah, Synod ah Centralised in i kikkaikhawm un i kilamkai ua, hinanleh Upa tamtahten Synod thu zong donse lou in eima ut dandan in Hattuum ah vai i hawm ua, Synod in 70% sun ding a chi lai in 50% sung toh sung mawngmawnglou toh i

umta uhi. Heitah Lai Siengthou toh kituoh ahi tadiei? Pasian in lah “Sawm-a-khat kei a ahi...” chin chientah in a gen giagua ngal a.

Mangpa toh inn i lamlou ziehun i lam thawn ua, Mangpa toh Hattuumte i venlou ziehun i veng zou tasih ua, koima a kithuzawpen zong um talou in eima utna lam chiet ah Belam bang in i vahvaita uhi. Hattuum lamkaiten thupitah in Biehinn i lam ua, khapet zen a Pasian a ding chi a i sep lai un i nasep hoiloute ziehun Hattuum ah hagau teng theitalou in Hagau laa sa a lam dupdupna mu ding a tawm mamata hi. Nupi lam ding teng zong lam thei nawntalou. Kitawh ngong leizong tawh but ding zong kihitalou. A khiei pen hiding ut umlou, ahivang a sil hoi bawl umtalou in kithupisah leh kimawsahtuona in i gam a dim siengta hi.

Tuaziehin Biehinn thupitah i lamleh Hattuum a kehse hieihiei a, Hattuum phelsie i suohta uhi. Nu-le-pa Inn thupitah lam a, a sung a tate neh ding pelou toh kibang i hi ua, bangza in Crusade leh Revival la nanlei Agam leh A dihtatna suilou a ahausatna i sui masah ziehun bangma mu ding a um sih hi. Lai Siengthou inlah

Mathiu 6:33 ah “Hinanleh Pasian Gam leh a dihtatna sui masa un, tuachi’n tam silte zousie piehbe na hi ding uhi” a chi hi. “A gam leh A dihtatna” chi thupi bang in i nei ua, hinanleh eiten i zui ngapsih ua, a ga mu thei ding a um ngaisih hi.

Pasian biehna ding thupi tahtah Biehinn i lam ua, hinanleh Pasian Hattuum khu i phelsie sie mai uhi. Nu-le-paten Biehinn thupi tahtah i lam ua, a sung ah i tate a kai ngapsih uhi. Pasian in Biehinn a chipen khu I lungtang sung ahia, Pasian Mite lungtang sung a Pasian teng theilou ding khop a siem a nna i sep lai un Hattuumte a ding a nasem banga kingaituo in i hapan mama mai ua, Pasian nna khu Ama A neipa toh semlou in eima ut dandan in i sem uhi. Innlampa sangin inneipan a inn hoi ding deizaw lou ding ahiei mah? Inn khat a kilam chiengin inneitu dei dan a kilam hilou ahiei mah? Eiten Inneitu donglou in eima ngai a thupi theipen in i lam ua, hinanleh Pasian taten Pasian lungtuoh bang in a be thei nawnsih uhi. I phattuum ngainate kivel chien va ui. Pasian a leh ei a ding zong khentel thei nawnlou khop a du-am i hita uhi.

Eima min thupina ding ngaituolou in ita-inauten bangchi in Pasian hagau puina a tang thei ding uoi? chi thupi ngai penlei hoi zaw ding hi. Ei a ding leh Pasian a ding nasan khen theilou khop a du-am i hi dan theichien sawm in Pasian kungah ngaidam ngen in thupha tawi va ui.

Leeng Saul in ama thei dan a kilawm tah in Pasian bieh a sawm a, Pasian in a galsatna ah a galte zousie tha sieng ding leh gantate zousie zong tha a a neisate uh zong haltum ding a chi lai in Leeng Saul in Lengpa salmat a hing pui in bawngnou hoi tahtahte Pasian biehna ding in a hing kai a, Pasian a kipah sih hi. I Pasian khu bieh mai a lungkim hilou in Ama thumanna ah a lungkim zaw hi.

Unau kingaituo in Biehin lam masa lou in Hattuom lam masa va ui. Hattuom sung ah Hagau in nna a hing sep chiengin a poimaw zousie hing pawt mai ding ahi. Eima hatna muong a sil i bawl chiengun lawchinna zong umlou ahizie in Pasian hatna muong in Ama dong kawm in Hagau lam hinkhuo lam va ui.

I Biehin lamna vante uh zong dihtat tah a lei hileh a deihuoi

hi. A man tawm theithei ding ngaituona in Solkal in heitah a hiei a ding a a piehte bang i lei ua, dihloutah in i lam uhi. Pasian in dihtah a lam a dei hi. Abraham in a tapa a lat ding lai in atapan thu a doh chieng in “Mangpan a ngaituo ding hi” chiin a dawng hi. Eiten Mangpa ngaituosahlou in eima i hapan sengseng ziehun Mangpa panna ding zong mun awnlou in ha pan in i pang ua, lawchinna tahtah hei ah ahiei? Eima i ha pan sengseng chiengun eima sung ah kilungtuohlounate hing pieng in kipawlkhenna tanpha hing tung leng hi.

Laate 127:3-5 ah tate thupina a gen a, *“Ngaivawi tate khu Mangpa apat a i goutan uh ahia, tualeh gil a ga zong a kipahman a hing pieh ahi. Hatlai tate khu mihat khut a, thaltangte bang ahi uhi. A thal bawm dim a thaltang nei mite ahampha uhi, kulpi kotkhah a a galte toh a kihou lai un zong a zalah sih ding uhi.”* a chi hi. Pasian guolzawl na i tan Tate khu thaltang bang a zah thei ahi naile? Oleh ei a ding a liem theina ahizaw ama? Mi hat khat in thaltang a bawm dimtah a puoh a galsatna a guolzoupa a bang ei ahilouleh zumna-zana tuntu ahi uoi?

Bangkim ah Mangpa toh lam khawm in Mangpa toh Veng khawm lei Biehinn zong hing hoi van, i tate zong i Hattuum sung uah a bit ding uhi. Mangpa tellouna Hattuum khu bangchi bang in lam in veng nanlei a thawn bep ding ahi. Jingmawng

matah a thou a vaigei tah a lum a i sep vevawte zong phatuomlou suoh thei hi. Mangpa nasem in i kigen ua, hinanleh eima a ding maimai buoipi in i sem kha leng uhi. Mangpa toh lam khawm, sem khawm in veng khawm va ui.

Ila masa sutzopna

TMEF ZILSAHNA A BIT EI?

C. Lalnuntlinga

Compiled by:- Upa Dr. PC Biaksiana

+ *Hun nukhia ahita a, kizilsahna lamdang, pom nuom leh zangkhitah ahing pawt zel ding hi. Tua hun chieng in Pasian Thutah, Bible toh akituoh ei? chi ngaituo zel a poimaw ding hi. Bangchi bang a gen siem leh Hagau mi hinanlezong 'Bible dan ahiei?' chi i ngaituo masah zel a poimaw ding hi.*

C. GINGTU HINKHUO AH:

i) Ei bawl thei umlou:

Tu in gingu hinkhuo tungtang a TMEF kizilsahna khenkhat zil chien deu va ui. TMEF kizilsahna thupi khat khu, 'Ei bawl thei umlou' chi ahia, tam khu chiemmuina leh kholai hamkam in zong nasatah in zah ahia, TMEF kizilsahna apat hing piengkhe ahi.

A kizilsahna uah, Siemtu i biehnah, hundampa i pahtawina ah leh lei-le-van

Mangpen nna i sepna uah mihing bawl um mawnglou in ama Pasian zaw in za lah a zakhat (100%) mihingte lah ah nna a hing sem hi chiin a kizilsah uhi.

Amauten asie-le-pha theina ah i theinate, i lungsim leh ngaituonate, i tahsa lam a kise dimdem, Pasian a ding a zah tah um nawnlou bang a a kizilsah ziehun pientha zou chiengin zong mihing masa khu bangma bawl theilou in a ngaituo uhi.

Haugau Siengthou ahiei, Thutah ahiei khun mihing ah nna a hing sem mai ding a, mihing sie-le-pha theinate, lungsim leh ngaituonate khun sep thei neilou mawngmawng chia a kizilsah ziehun “Ei bawl thei umlou” chi hamkam a hing piengkhetah hi.

Gen dan dang khat in, mihing khu “Haugau Siengthou Puon” bang in a ngaituo uhi. Tua Haugau Siengthou in apuon sil pen khu i sie-le-pha theinate, i lungsim leh ngaituonate a khawlsah ding a, Ama Pasian maimai zakhat ah zakhat (100%) in nna sem hi in a ngaituo uhi.

TMEF kizilsahna khu Paul hun lai a GNOSTIC kizilsahna dihlou tah toh a kibang sim mama hi. Gnostic-te khun tahsa leh haugau a khenkhie (matter and spirit) ua, tahsa ah khun hoina khatbeh zong a umsih a, sil hoi zong a bawl theisih a, tahsa apat in bangma ahoi a hing pawt theisih hi chiin a zilsah uhi. Sil hoilou a chi pen un mikhiel a hina uh a belap sih a, sil hoi a chi pen un zong mikhiel ahina uh a kiemsah tuomsih hi! Tuaziehin,

Gnostic-te bangma kisumlou in um leizong a khiel kihi tuomlou ahi a chi uhi.

I tahsa silbawlah Pasian a kipah tuomsih chi TMEF kizilsahna khun sil hoilou bawl zong a khawhsih chi a kawh thei hi. Tuaziehin, a tangpi a a kilah dan in TMEF-te lah ah tep-le-muom khawhsahlouna a tam mawng ahi. Mihingte sie-le-pha theina leh lungsim leh ngaituona, tahsa tanpha ah Setan a, se dimdem, Pasian a ding a pom tah themkhat zong umlou, pientha masang leh pientha zou a zong danglamna umlou a kibang chia kizilsahna khun sil hoi bawl zong tahsa in a bawl, Pasian a ding a pom tahlou ahiziehin, sil hoilou bawl zong tahsa in a bawl ahiziehin Pasian a ding a khawhlou chi lam a kawh thei hi.

Tam kizilsahna khu Lai Siengthou toh a kituoh ngel ei? ‘Kituoh vawtlou’ chiin i dawng thei ngal ding uhi. Khristiante khun ginna leh nasep lam a tena dihlou theilou, Pasian thu, BIBLE i nei ziehun Lai Siengthou apat in zil va ui. ‘Mihinglam

sep thei umlou' chi zong a thubul a zung kai zaw Genesis (Siemchilbu) bung bul lam, khelna a puana zong ahi. Khelna puasiet zou in Pasian i bahnauh zakhat ah zakhat (100%) a mang sieng a, zakhat ah zakhat (100%) Setan toh kibangta chia a kizilsahna ziehun gingtu hinkhuo zong mihing silbawl tel mawngmawnglou chiin a gingta uhi.

Hinanleh, Gen. 3:9 ah Siemtu khun mihing a hing suina i mu ua, Adam kungah dohna thum leh Evi kungah dohna khat a bawl apat in Pasian in puasesa mihing kung apat lam-et a nei a, phut zong a nei chi a kichien mama hi (Gen. 3:9-13). Eden huon apat nawkhiet ahi zou un zong Abel silbawl khu pasian in a pom chi i mu uhi (Gen. 4:4). Abel tha ahi zou nua in amathatang a mangpan a pieh Seth leh ahah-le-suonten Mangpa min law uh thu i mu uhi (Gen. 4:26).

Tualeh, khelna a puaseta, Adam hah-le-suon apat Enok khu mangpa toh a zawkhawm thu leh tahsa

shina zong chiemlou a ahing a van a lahtou ahi thu Genesis 5:22-24 ah i mu uhi. Tamte leh mun tamtah ah khelna puasie mihing khu Pasian a ginna leh a silbawlte Pasian in a pompieh thu i mu apat in TMEF kizilsahna khu Bible (Lai Siengthou) kal leh thutah ahilou dan a kilang chien mama hi.

Khelna a puasie mihing in a sunggil lama Pasian a bahna etsahnan, sienthounate, itnate, dihnate khu mangsahta nanleh Pasian siemsa ahina khu a mangsah theisih hi. Gen dan dang in genlei, Pasian siem mihing ahina a mansuosih hi. Gendan dang in genlei, Pasian siemsa mihing ahi veve hi. Asie-le-pha theina, a lungsim leh ngaituona leh a sigui zam zousiete Setan solna ziehin khelna in zel suoh nanleh Pasian siem ahina mang ding khop in a zelsuoh theisih hi. Mihing sie-le-pha theina leh a lungsim leh ngaituonate khu Pasian khutsuoh ahina a beisih hi.

Sia (iron) khu sia ahina kilang theilou khop in sameh (tuieh)

in liekhu nanleh sia ahina bei in sing a suoh ngailou bang in, Pasion khutsuoh a hinna apieh mihing khu Pasion siem ahina zong lang zoulou khop in khelna in bawm in liekhu nanleh Setan siem ahi thei ngaisih hi.

Pasion khutsuoh mihing ahi zing a, Pasion in ama dei, lam-etna leh phuut zong a nei nalai hi. Jeremia 17:9 ah khun mihing lungsim khu kise dimdem ahi thu Pasion in Jawlnei zang in a puong a, hinanleh, Pasion ma in mihing in a lungtang zousie toh Ama it dingin phutna a nei nalai hi (Duet. 6:5; Pawt. 22:37; Mk. 12:30) Khum lungsim kise dimdem khu Jesu Khrist hing shina leh thawkiana ginna dingin Bible in a phut ahi (Rom. 10:9-10). Khelna a puasesa mihing lungsim ma khu Khrist tenna ding ahi hi (Eph. 3:17).

Khum mai hilou in, Nasepte 15:9 ah khun, “Aman eite leh amaute khentuom neilou in, ginna ziehin alungtangte uh asiengthou sahta hi” chi i mu uhi. Tamte bang a Lai Siengthou dang leh Jawlneite

laibute ah mihing lungsim khu heh a, lungsim tha pieh ding in zong ana gen hi. Hinanleh, tam mihing lungsim siem tha ahia, suhsienghou chi lam genna in Lai Sienthou ah a gen tamzaw hi.

Siemtu Pasion khum mihingte hatkhetna ding in lemguot a siem a, Tapa Pasion in Pa lemguot lawchinna dingin a hinna pumpi khu Kross ah pie in shina toh lawchingsah dingin a hinna lultah khu Kross ah pie in shina zou athawkiana in a subukimta hi.

Hagau siengthou Pasion khu, gingtute hinna ah lut in Siemtu chibai buh ding leh hundamtu phat a pahtawiding in leh a lalna nasepsahdingin a siemtha kiata hi.

Hagau siengthou zal in Siemtu khu zatat tah in chibai i buh ua, hundamna khu nuomtah in i pahtawi ua, lei leh van mang khu zau leh ling kawm in a nna i seppieh uhi. Tuabang ma in Hagau siengthou in Siemtu khu chibai a hing BUHSAH sih a, a hing PAHTAWISAH sih a, A nna zong a hing SEMSAH sih hi. Chibai buh

a, pahtawi a, A nna sem thei dingin a hing siem tha a, hatna a hing pe zaw hi. Azieh khu sah chipen in thuneina zang a paubawl thu a kawh thei a, tuaziehin mihing lam in tanvou leh mawpuohna umlou in, bawlsahtu ah zakhat ah zakhat (100%) mawpuohna akinga a, mihing khu deitena bangma a umsih china ahi.

Thugin chi ahileh, Hagau Siengthou mawpuohna leh mihing mawpuohna a um khawm tuohtuoh china ahia, a pangkhawm china zong ahi hi. Bul pantu vang mihing ahisih a, amasa lam a i tahlat tah bangun TMEF-ten thutah a chi uh khu ‘Gingta theilou’ chi khu ahia, a gintat theilou khu GINTATSAH a ngaita hi. GINTATSAH ahi veveleh, Pasian in deisah tuom aneilou ziehin mi zousie a GINTATSAH ding ahi. Aziehpén gingu (mihing) lam a mawpuohna a umlou a, GINGTASAHTU (Pasian) lam maimai zakhat ah zakhat (100%) mawpuohna a um china hiding ahi. Tam khu Lai Siengthou hing zilsahna dan

ahisih a, Hagau Siengthou khu Jesu Khrist Mang leh hundampa a pom ding a hing panpitu ahi zaw hi.

ii) Mihing lam silbawl Pasian in a pomlou:

TMEF zilsahtu khenkhatten a tuom a ngaituo lou a, a gawmkhawm uh khat khu hundamna ding leh hundamtate dingin chi khu ahi. Hundam tanna dingin mihing lam silbawl pasian in a pomsih chi khu Roman Catholic a pat a pawt, Potestant-ten i thugin kingahna suongphum ahi.

Hundam tanna ding a mihing lam silbawl, dihtatna, hoina, sienthouna khu Pasian in na pom hitaleh Mangpa Jesu a hing pei a ngaisih ding hi. Hebru 10:7 ah khun “Na deilam bawl dingin ka hing pei,” chi i mu hi. Mihingin Pasian deidan a bawl theilou ziehin Jesu khu mihing a hing pieng in eite thatang in Pasian deilam khu a hing bawlpieh a, Kross ah a hing bukimta hi.

Tuaziehin, Hundamna dingin mihing lam silbawl khu Pasian pom tah leh kipahna

ching zou a umsih chi khu Lai Siengthou kizilsahna, Pasian thutah khu ahi. Hinanleh, tam khu Hundamna tangsa gingtute hinkhuo toh ngaituokhawm ding ahisih hi.

Azieh khu, gingu khu sil hoi bawl dinga siem tha ahi. “Sil hoi bawl dinga Khrist Jesu ah khum siem a um in ama khutsuoh ihi ngai ua, khum sil hoi bawl khu i umna dingua Mangpan a guotlawhsa ahi” (Eph. 2:10). “Pasian gintute khun sil hoi bawl zel ding ngaituo uhen.” (Tita 3:8). Gingtute khu koite ahiei chia dohna khu ‘sil hoi bawl dinga siemthate’ chi khu a dawnna dihtah ahi.

Gingu i hi masang ua i sil hoi bawlte khu Pasian mai ah pom tah leh chingzou umsih nanleh gingu i hi zou ua i sil hoi bawlte khu khat zong thawnlou ding ahia, i silbawl bang zel ua nuomman mu ding a zilsahte i hi uhi. Lai Siengthou in, “ngai wawi, hing pei bai ding ka hita, michin a silbawl bang zel ua pieh ding in ka nuomman ka kung ah a um hi” chiin a hing hil hi (Kihilna 22:12).

Gen dan dangkhat in gen talei; Hagau Siengthou khu gingtute haguahing thunun leh a ut-ut bawlsah ding a hing pei ahisih hi. Sil hoi bawl ding a hatna mawngmawng neilou leh bawl thei nei nawnlou khu siem tha a, hatna hing pe ding a hing pei ahi zaw hi. “Hagau Siengthou ngei khun eima hagau toh Pasian tate i hi chi a hing kitheisah hi (Rom. 8:16)”. Hagau Siengthou khu “MI” hina nei ahi bangma in Hagau mi hina zong neikhawm dingin a hing pei hi. Tuachin gingu hinkhuo khu Leng hinkhuo hilou in, Hingkhawm ahizaw hi. Hagau Siengthou zakhat ah zakhat poimaw bang a gingu hagau zong zakhat ah zakhat a poimaw hi.

Tuaziehin, Hagau Siengthou zal a gingtute sil bawl theite khu Pasian pom tah leh kipahna taah, atawpna ah nuomman zong um ding ahizieh in Paul in Galati 6:9 ah khun, “Tuachin sil hoi bawl seda sih va ui, i lungkieh sih nah pouleh ahuntah ah a ga at ding i hi ngal ua.” chiin Galati gingtute ana hanthawn hi.

TMEF kizilsahna khen
 khatten a awi-am ua, abawl
 khiei thei uh khu, hundamna a
 ding a silbawl leh hundamsate
 silbawl khenkahlou a, a
 ngaikhawm chiengun mihing
 silbawl Pasionin a pomsih
 chi khu khatna ahia, tualeh,
 gingu hinkhuo a Hagau
 Siengthou nasep tuom
 khenlou a, a ngaikop ziehun
 a bawl khiei mama uhi. Sil
 hoi bawl ding a siemtha hisa
 mihingte silbawl khu Pasion
 pom tah ahi chi Lai Siengthou

kizilsahna, Pasion thutah ahi.
 Hun nukhia ahita a,
 kizilsahna mah leh lamdang,
 pom nuom leh tawldam
 huoi tahtah a hing piengkhe
 zel ding hi. Khumbang hun
 chiengin Pasion Thutah, Lai
 Siengthou toh kituoh ahiei?
 chi i ngaituo zel ding uh a
 poimaw hi. Bangchi bang a
 gen siem leh Hagau mi hinan
 uleh “Lai Siengthou (Bible)
 gen dan ahie?” chi i sui masah
 zel a poimaw mama hi.

ZPWF COLUMN

22nd June to 20th July 2018 sung a Tunnu Limbel panpina pete:

1. Pa Kamkhogin, Central Church	Rs.	200
2. PWF Awnchinkap Khuo Anntang Kg 45½ &	Rs.	590
3. Nu Lamnu, Behiangtung	Rs.	100
4. Rev. Thangboi Khuongsai, N. Khaukual	Rs.	500
5. Nu Nianglianman, Awnchinkap khuo	Rs.	100
6. Pa Zamkothawng, Aina (Maitam)	Rs.	1,110
7. Nu Vungpi, N. Khaukual	Rs.	200
8. Nu Chiinmuankim, Central Church	Rs.	500
9. Nu Dimneiching, Central Church	Rs.	1,000
10. Nu Nianglianming, Lailamveng	Rs.	150
11. ZPC Shillong	Rs.	4,000

12. Nu Ngaizaniang, Zomi Colony	Rs.	200
13. Nu Vahkhohling, Tuibuang	Rs.	200
14. Nu Chiinniang, Hiangtam'K'	Rs.	500
15. Nu Lhingzahoi, Tuibuang	Rs.	500
16. Nu M. Niangngaiching, Zomi Colony	Rs.	200
17. Rev. Awnkhankhup, Tuibuang	Rs.	500
18. Nu Vungneikim, Lailamveng	Rs.	200
19. Mrs. Flora Hatnu, UK	Rs.	43,000
20. Nu Donzaht, Behiangjang	Rs.	100
21. Nh. Esther Vahhoiching, Behiangjang	Rs.	500
22. Nu Kimhoi, Tuibuang	Rs.	500
23. Nu Mannianching, Lailamveng	Rs.	500
24. PWF Tonjang Anntang	Kg.	50
25. Nu Ngailian, Zoukhonuam	Rs.	2,000
26. PWF V. Bethel te apat:		
i) Tangmai pum-		36
ii) Begap lom-		7
iii) Mai pum-		4
iv) Um pum -		1
v) Vaimin-		3
vi) Lengthei pum-		3
vii) Menal lom-		1
viii) Begul lom -		1
ix). Siing lom -		1
x). Hai pum -		5
xi). Seh pum -		7
27. PWF Lamka District ten camp anei hun ua anntang annehval uh half bag khat		

***Petu zousie Mangpa'n hing guolzawl zing taken.
Adihloute Office a suhdih theizing ahi.***

PATRON MEMBER-TE

1. Upa Gouzamang	2. Pu Hav. Khamchinkhup	3. Pu Khamzalam	4. Pu Chinzasuan
5. (L) Upa Liansuanpau	6. Pu Khamchinthang	7. Pu S.Dalthang	8. Upa Kapkhanthang
9. Upa Langginmang	10. Upa S. Nangkhanlal	11. Pu S. Lamkthoang	12. Upa Dr. M. Lachinkhai
13. Upa Khamchinjam	14. (L) Upa D.K.Manlun	15. Upa Suankhanmang	16. (L) Upa Khupgou
17. Upa Chinkham	18. Upa Ngulchinkham	19. (L) Rev. V. Vungzalian	20. Rev. Retd. Kamkhosoi
21. Rev. Retd. Tualzachin	22. Rev. (Rtd.) H. Nengzaton	23. Rev. Awnkhankhup	24. Rev. Dr. Hangpi Manlun Zou
25. (L) Pu Tuanzapau	26. (L) Rev. Ginchinjam	27. (L) Rev. Khamzasuan	28. Upa T. Lamkthohawng
29. Upa Khaichinmang	30. Rev. Stephen Chinzathang	31. Pu Khupkhanmang	32. Pu Khaidohlian
33. (L) Hav. Khamzahang	34. Pi Vungzanuam	35. Pu T. Gouzadou	36. Upa Liensuonkap
37. Pi Zelkhochiin	38. Pi Hatkhanvung	39. (L) Pi Ngaihoiching	40. Pi Mankhannieng
41. Pu Goukhanmang	42. Pi Chingzalam	43. Pu S. Thianzakhai	44. Pi Kamkhanching
45. Pu Haukhanpau	46. Pu Tuallianmang	47. (L) Pu Dongkap	48. (L) Pi Chingkhanmang
49. Pi Donkhonian	50. Upa Henzakhup	51. (L) Pu Saichinpau	52. Pu Goumang
53. (L) Upa Khamkhanhang	54. Shie Laangkhanlal	55. Pu Khamkhanlun	56. Upa L. Tualkhanpau
57. Upa Jamsianmung	58. Upa Ginzadong	59. Pu Kaizathang	60. Pi Goizanuom
61. Pi Thangneivah	62. Pu Khamzathang	63. Pi Donchin	64. Upa Liankhanmang
65. Pu Hauchinlun	66. Pu T. S. Lal	67. Pi Goichiin	68. Pu T. Khupchinthang
69. Upa T. Kaizalam	70. Pu Paul Henkholal	71. (L) Pu Soikham	72. Rev. P.C. Manga
73. Rev. Khamchinkhai	74. Rev. Jamlianpau	75. Rev. Chinzapau	76. Rev. Retd. Kamkhozam
77. Upa (L) Chinpu	78. Pu Zamkhanthang	79. Pu Chinglen	80. Miss Chinhaunieng
81. Upa P. K. Soia	82. Pu Goukhai	83. Pi Niangkhanmang	84. Evan. Retd. G.L. Joshya
85. Pi S. Chingkhanmang	86. (L) Pu Vumchinkhup	87. Upa Khaihenthang	88. Upa T. C. Pau
89. Upa Nengchinkap	90. (L) Upa Jamkhongam	91. Upa HT Manga	92. Mrs. Vahkhohling
93. Pu Hauliankap	94. Pi Chinnu	95. (L) Upa Ngulzakhai	96. (L) Upa T. Gougin
97. Pu Ginsuanhau	98. Upa (L) Langminthang	99. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thathang Taihul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. Rev. (L) Mangsuanthang	115. (L) Pu Lamchinhou	116. Upa Pauchinlel
117. Nu Kimneihei	118. Upa Kamgenpau	119. Nh. Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munluo	134. Pu Sianzakhai	135. Upa Thangginsuan	

LIFE MEMBER-TE

01. Upa (L) T. Khupkenpau	02. (L) Pu M. Ginzahau	03. (L) Pu Selzapau
04. Pu L.C. Pautungnung	05. (L) Pi Khamkhannieng	06. Pi Ngaiuom
07. Pu Chinsuanthang	08. Upa Shanti Kumar	09. Pu Kamkhohau
10. (L) Pu Khamkhohau	11. Upa Khamzathang	12. Upa Chinkhanthang
13. Pu Tongzathang	14. Pi Chiinneilam	15. Upa Kulthang
16. H/Sm. Upa Kaichinpau	17. Pi Niangzalam	18. Upa P. Doukholun

Undelivered

Please return to:

The Editor

KHRISTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
